


宸垣識畧

卷三卷四

其

皇城圖 卷三



宸垣識畧卷三

仁和吳長元太初氏輯

皇城一

皇城在京城周十八里有奇正南曰大清門少北曰長安左門曰長安右門東曰東安門西曰西安門正北曰地安門大清門之內曰天安門天安門之內曰端門端門之內左曰闕左門右曰闕右門正中曰午門爲紫禁城大清門之南對正陽門

皇城廣袤三千六百五十六丈五尺高一丈八尺下

宸垣識畧

卷三

一

廣六尺五寸上廣五尺二寸

考按燕京累朝宮室自遼以前記載無多惟西苑之太液池瓊華島爲金明昌中萬寧宮西園遺蹟乃當時別館所在金時大內以地理揆之當在今廣寧右安二門外元代宮室大內在太液池東隆福興聖二宮在太液池西今西苑及旁近之大高元殿光明殿諸處應卽其地明改建宮城在元大內迤東宣德間又拓東華門于玉河東岸我國人多仍勝朝之舊

大清門三闕上爲飛檐重脊前地正方繞以石闌名棋盤街左右石獅二下馬牌各一

長元按大清門明曰大明棋盤街又名天街翫月最爲清曠

查嗣琛雜咏詩棋盤街濶靜無塵百貨初收百戲陳向夜月明眞似海參差宮殿湧金銀

門之內爲千步廊東西向各百有十間又折而北各三十四間

凡吏兵兩部月選官掣籤刑部秋審禮部鄉會試磨

宸垣識畧

卷三

二

勘俱集于廊房之左右廊之外東爲戶部米倉西爲工部木倉

千步廊東接長安左門西接長安右門東西向明正統間作公生門于左右長安門之外南向

長元按東西長安門通五府各部故作公生門以便出入市人訛爲孔聖門

兩長安門之中南向爲

天安門五闕上覆重樓九間爲 皇城正門前環金水河跨石梁七卽外金水橋也前立華表二門內立華

表二

凡頒詔設金鳳朶雲于天安門上堞口正中宣詔官朝服領耆老咸集行禮奉詔承朶雲由金鳳銜下

毛奇齡天安門頒詔詩雙闕平明捲霧開 九重

頒詔出層臺旛懸木鳳銜書舞仗立金雞下赦來
彩櫝橫時天宇濶黃封展盡聖心裁策災本是賢
良事何處還尋杜谷才

長元按天安門明曰承天 本朝順治間改

門內東西兩廡各二十六間東廡正中爲

宸垣識畧

卷三

三

太廟街門西廡正中爲

社稷街門

兩廡之北正中南向爲

端門門制與 天安門同門之內東西兩廡各五間其

北東有 廟右門西有 社左門迤北兩廡各四十

二間爲部院府寺監朝房又北東出者爲闕左門西
出者爲闕右門門北東西兩廡各三間爲王公朝集

之所中南向爲 午門

凡八旗都統會議俱集 闕右門下九卿會議揀選

人員驗看月選官員俱集 闕左門下

中書科直房在 午門外西廡之北

六科給事中直房在 午門外兩廡吏戶禮西向兵刑
工東向雍正二年始以六科隸都察院吏科北有

聖祖御製并御書臺省箴清漢碑各一通

太廟在闕左朱門黃瓦衛以崇垣大門三左右門各一
戟門五間崇基石闌中三門前後均三出陞中九級
左右各七級

前殿十有一間重檐脊四下沉香柱階三成繚以石闌

宸垣識畧

卷三

四

正南及左右凡五出陞一成四級二成五級三成中
十一級左右九級

凡歲暮大禘日王公二人各率宗室官奉

列祖暨 后神位合祀于此時饗祇奉 中殿神位

祧廟主不與焉

中殿九間同堂異室內奉

列聖 列后神龕均南向後界朱垣中三門左右各一

門

後殿制如 中殿奉

祧廟神龕均南向

前殿兩廡各十有五間東廡爲配饗王公位西廡爲配饗功臣位東廡前西廡南燎爐各一

中殿後殿兩廡各五間均藏祭器 後殿東廡南燎

爐一

戟門外東西井亭各一前跨石梁五橋南東爲 神

庫西爲 神厨各五間

廟門東南爲宰牲亭井亭廟垣周二百九十一丈六尺

宸垣識畧

卷三

五

尤侗孟夏時享恭紀祖德開基遠宗功創業宏顯

承 三后配享祀四時成禴祭宜昭告齋居致潔

誠諏辰逢今日辨色訝新晴肅肅 鑾輿轉駸駸

羽騎行千官趨劔佩百辟拜簪纓仙仗排空靜爐

香入座清尊彝陳酒醴俎豆薦粢盛舞按咸池節

歌諧仲呂聲皇哉通陟降允矣格幽明盼嚮純禧

集居歆景福并嵩呼稱萬歲四海樂昇平

王士禎十月朔 上親祭 太廟是夜雪恭紀烝

嘗崇 九廟雲物麗層霄 三后神靈遠中天陟

降遙 至尊思盼嚮列侍肅金貂六出豐年喜先
迎御仗飄

社稷壇在闕右 壇制方北向二成高四尺上成方五
丈二成方五丈三尺四出陛各四級皆白石上成以
五色土辨方分築內壝方七十六丈四尺高四尺厚
二尺甃以四色琉璃甃各隨方色覆瓦亦如之門四
各二柱柱及楣闕皆白石扉皆朱櫺內壝西北瘞坎
二 壇北
拜殿 戟門各五間上覆黃琉璃前後各三出陛

宸垣識畧

卷三

六

內壝西南 神庫 神厨各五間井一

壇垣周二百六十八丈四尺內外丹墀覆以黃瓦北
三門東西南各一門

西門外宰牲亭一井一北門外東北隅 正門一左
右門各一

張湄春社齋宿臺中詩瑤壇紫氣接 宸居拂拂

條風起蟄初六府養民先土穀千官從祀肅簪裾

春生太液蒲芽淺月冷南臺栢影疎慚愧微名題

諫院皂囊猶有未陳書

皇史宬在內南城南 太廟之東南爲明代藏寶訓實錄處 本朝仍之尊藏

列聖實錄暨

玉牒有

御製詩碑

明嘉靖十七年秋七月命建皇史宬于重華殿西欲置金匱石室其中也勅閣館諸臣重書九朝寶訓實錄藏之

考按宬與盛同義莊子以匡宬矢說文曰宬屋所

宸垣識畧

卷三

七

容受也然殿宇命名於斯僅見耳又左右小門曰躋歷以龍爲躋皆世廟自製而手書也

綴疋庫庫神廟在內東華門外小南域名裏新庫卽明英宗所居之南內永樂中所謂東苑也有 本朝雍正九年重修碑

明永樂十一年五月癸未端午節車駕幸東苑觀擊毬射柳命羣臣賦詩賜宴及鈔帛有差十四年端午節亦幸焉

明王直端午憶去年從幸東苑詩千門晴日散祥

烟東苑宸遊憶去年玉輦乍移雙闕外彩毬低度
百花前雲開山色浮仙仗風送鶯聲繞御筵今日
獨醒還北望何時重咏栢梁篇

長元按永樂時射柳之戲藏鴿于葫蘆或盒內懸
于柳上射中合開鴿飛而出以此爲樂

宣德中東苑有草舍一區乃上致齋之所一小殿梁
棟椽桶皆以杉木爲之不加斲削覆之以草四面闌
楯亦然少西有路紆迴入荆扉則有河石甃之河南
有小橋覆以草亭左右復有草亭東西相望枕橋而

渡其下皆水游魚物躍中爲小殿有東西齋有軒以
爲彈琴讀書之所四圍編竹籬籬下皆種蔬茹匏瓜
之類嘗命尚書蹇義夏原吉楊士奇楊榮觀之

南城在大內東南英皇北狩還居之其中翔鳳等殿
石闌干景皇帝方建隆福寺內官悉取去之又伐四
圍樹木英皇甚不樂旣復辟下內官陳謹等于獄尋
增置各殿爲離宮者五大門西向中門及殿南向每
宮殿後一小池跨以橋池之前後爲石壇者四植以
栝松最後一殿供佛甚奇古左有迴廊與內殿接倣

大內式爲之

考按東苑久廢其地當在今東華門之東南景泰間英宗居之稱曰小南城蓋東苑中之一區耳復辟後又增置三路宮殿因統謂之南城

飛龍橋在內南城跨玉河卽明飛虹橋遺址

皇史宬之西過觀心殿射箭處稍南則嘉樂館也其北曰丹鳳門門外列金獅二內有正殿曰龍德左右亦有配殿正殿之後則飛虹橋也橋以石爲之鑿龍魚水族甚精傳自西域得之

宸垣識畧

卷三

九

明朱維京度飛虹橋詩鯨海遙涵一水長清波深處石爲梁平鋪碧甃連馳道倒瀉銀河入苑墻晴綠乍添垂柳色春流時泛落花香微茫迴隔蓬萊島不放飛塵入建章

橋北有坊二曰飛虹戴鰲姜立綱所書也橋北有山山下有洞額曰秀岩以磴道分而上之其高高在上者乾運殿也左右亭各一曰凌雲曰御風界以小石藤蘿花卉若墻壁焉

明龔用卿乾運殿詩團團小殿古陰斜石檻玲瓏

映水花翠輦不來金鎖合綠楊深處有啼鴉
考按龍德殿諸處今廢其地在南池子西南猶有
名飛龍橋者蓋飛虹音訛

普勝寺在緞疋庫東南與皇史宬俱明南內舊址去菖
蒲河牛郎橋不遠順治八年

勅建有內翰林國史院大學士甯完我碑乾隆九年修
有工部侍郎勵宗萬碑四十一年復修

普度寺在裏新庫北明南城舊宮遺址康熙年建舊名
瑪哈噶喇廟乾隆四十一年 賜今名有

宸垣識畧

卷三

十

御書額 國初爲睿親王府後改今寺左爲黑護法佛
殿內藏鎧甲弓矢皆睿親王物也

長元按明南內有洪慶宮爲供番佛之所殆所謂
瑪哈噶喇也入睿邸時或佛像尚存其後因建爲
廟歟

廟東地名瓷器庫巷口石獅二臨河巷有南北兩汊
內有黑琉璃瓦房蓋舊時庫房

馬鞍橋在普勝寺東北
南箭亭在馬鞍橋河東

平橋在東安橋南

自皇史宬東南有門通河河上有湧福閣俗所謂騎馬河是也迤東沿河稍北則呂梁洪東安橋再北有亭居橋上曰涵碧又北則迴龍觀止焉其殿曰崇德者是也是河也從北安門外文昌宮迤東步糧橋入經皮房內織染局御馬監東東安門橋下至長安左門外迤東之玉河橋出焉

明陳棕詩河流細遶禁墻邊疏鑿清流不記年好是南風吹薄暮藕花香冷白鷗眠

考按湧福閣諸處今俱廢以河與橋証之則普勝寺東北有馬鞍橋當卽騎馬河舊址河東今爲南箭亭北有平橋在東安橋南當卽呂梁洪漾金亭舊址東安橋北又有橋橋上遺石礎二相傳有樓騎河今橋西街尚名騎河樓所云有亭居橋上曰涵碧者也又北今爲北箭亭崇德殿舊基當在其處

長元按明南城宮殿額名無涵碧亭而崇德殿在河東卽回龍觀尚有翫芳亭集祥門桂香館翠玉

館浮金館擷秀亭聚景亭呂梁洪左右漾金亭湧
福閣秋香館等名似與南內相接爲今南箭亭地
故海棠時駕常臨幸並未聞越東安門北而有別
館也考據蕪史以證今地因有東安橋再北五字
故以騎河樓北箭亭當之竊以今東安橋明稱皇
恩橋下云水從御馬監東東安門橋下不直稱東
安橋可知疑呂梁洪東安橋卽今馬鞍橋有涵碧
亭覆其上者卽今平橋又西苑之水從牛郎橋出
湧福閣所謂騎馬河以閣跨水上云

宸垣識畧

卷三

十二

東安門在皇城東稍南與內東華門相對

東安橋在東安門內大街

中官初入選進東安門門內有橋曰皇恩橋謂從此
卽受皇恩也俗呼曰忘恩橋以中官旣富貴必仇其
所生蓋恥之也

宋光熊蚤春出東安門詩南箭亭通北箭亭御河
春泮水泠泠東安橋上頻回首不見西山一抹青
光祿寺署在東安門內大街之北

世宗御書堂額曰敬慎有節

大官良醞署在東珍羞掌膳署在西司牲司牧二局
隸焉

光祿寺有鐵梨木酒榨相傳籍沒沈萬三家物每榨
用米二十石得汁百甕

槽房俱南向凡七層其南爲御酒房長春房採四時
花釀酒處也苦酒房造貞一酒處也

寺門曰大烹門內有如水軒四星堂等後空地瘞象
骨處

明張元易于光祿寺署中種竹甚蕃黎惟敬秘書題

宸垣識畧

卷三

十三

曰紫禁滄洲

南池子在東華門外東南

鞍作作在南池子長街南

外養狗處在南池子之南

門神庫在南池子西北爲明玉芝宮地

長元按玉芝宮明嘉靖所建世廟以祀興獻帝者

在太廟東四十四年廟柱產芝故名以地界考之

當在此

武備院署在東華門外北長街路西所屬甲庫氈作靴

皮作鞍庫等掌 御用武備及製造兵仗之事

外甲庫在東華門外北城下連房

外氈庫在東華門外北城下連房

外南鞍庫北鞍庫俱在東華門外北城下連房

熟皮作在北城下連房與騎河樓相對

恩豐倉在東華門外北圍房貯內監人等所食米

俄羅斯文館在東華門外北池街西

宣仁廟在北池街暖閣廠雍正六年

勅建以祀風神有

宸垣識畧

卷三

十四

世宗御書門額

凝和廟在北池街騎河樓南雍正八年

勅建以祀雲神有

世宗御書門額

吳巖冬夜宿雲神廟詩紫禁森嚴傍 帝居丁丁

寒柝夜何如雲神廟裏三更月有客被裘讀道書

關帝廟在騎河樓街廟兒胡同舊名暖閣廠廟有二鐘

皆鑄暖閣廠關帝廟字

明內東廠今無考係明季敝政其址久就廢沒以蕪

史考之當與暖閣廠相近

騎河橋在東安橋北蕪史云有亭居橋上曰涵碧今有遺石礎二在橋上橋西街北有關帝廟

北箭亭在騎河橋北蕪史云涵碧亭又北則回龍觀舊多海棠旁有六角亭殿曰崇德今北箭亭當卽崇德殿舊址

眞武殿在御馬圈南地名銀閘卽明御馬監裏草欄舊址有明天啟三年碑

御馬圈在銀閘蓋仍明舊也

宸垣識畧

卷三

十五

長元按騎河橋北有石基堵水中開二尺許當卽銀閘也其西爲御馬圈馬神廟諸處

馬神廟在馬神廟街卽明御馬監馬神舊祠有

聖祖御書廟內大鐘一上有明正德十年鑄又小鐘一大鑪一小鑪十五皆 本朝康熙年鑄

一等忠勇公第在馬神廟街東

○御馬監向東曰北花房曰印綬監曰中書房曰蹴圓亭今俱無考

明天啟中有龍見北花房之小河長尺許色黃碧有

爪無鱗其地近宋縉直房縉護以紅錦盛金盒中奏進命送赴黑龍潭

嵩祝寺在三眼井之東有

御書額爲章嘉胡圖克圖焚修之所

法淵寺在嵩祝寺東有銅鼎一高六尺有咫有

御製碑文

智珠寺在嵩祝寺西有

御書額

考按嵩祝寺東廊下有銅鐘一鑄番經廠字西廊

宸垣識畧

卷三

十六

下有銅雲板一鑄漢經廠字法淵寺有明張居正

撰番經廠碑據此則三寺爲明番漢經廠

吉安所在鐘鼓寺南明司禮監廨

凡宮眷薨逝于此殯殮

明司禮監廨後有松樹者卽內書堂也以翰林教授

小內官讀書處

凡教內書堂用史官四員赴書堂日詣生約四十餘

人自學士陳山始以後詞臣任之每學生一名各具

白蠟手帕龍掛香以爲束修

查嗣琛雜咏詩黃封內膳傳供給白蠟名香抵束
修辛苦何須識丁字生兒彌月卽封侯

○司禮監之南曰新房今無可考御馬監北有高房胡
同或卽其地

鐘鼓寺在鐘鼓寺胡同卽明鐘鼓司廨

明鐘鼓司掌印太監一員僉書司房學藝官無定員
掌管出朝鐘鼓及內樂傳奇過錦打稻諸雜戲按過
錦今之影戲也

五聖祠在酒醋局南蠟庫胡同內有一磬上鑄內府供

宸垣識畧

卷三

十七

用庫五聖祠供奉稍南地名內府庫

明內承運庫掌應用荷葉錫鑼錫鈔茶瓶汁瓶確鐺
等物又藏銀絹除歲用外其餘皆入內女官庫

興隆寺在酒醋局胡同有爐一上鑄酒醋麵局佛堂供
奉字

華嚴寺在內織染局胡同內有明弘治嘉靖二次重修
織染局佛道堂碑記有司設監名

朱彝尊 賜宅在景山北黃瓦門東南

朱彝尊詩講直華光殿居移履道坊經營倚將作

宛轉繞宮墻對酒非無月攤書亦有牀承 恩還
自晒報國祇文章

伽藍寺在玉河北前殿有鐘一上鑄火藥局字
火神廟在伽藍寺西

針工局胡同巾帽局胡同皆在玉河南

○皮房紙房梓潼廟皆在針工局巾帽局二胡同左近
俱無考

慈慧寺明司設監廨有明碑二 本朝康熙間重修有
碑記

宸垣識畧

卷三

十八

眞武廟在慈慧寺東南明簾子庫

玉皇廟明尚衣監舊廨 本朝雍正間重修其西卽黃
瓦東門門之外爲北安門大街

尚衣監製造皇帝皇太子親王袞冕袍服司設監成
造各宮蔑簞蒲蓆棕薦及進用龍床頂架帳幔轎椅
鋪陳衣包蓋秋花毯地氈圍幕油秋雨繖等物鋪設
龍簾走索席梯

三旗佐領管領署在景山後地安門甬路樓房
監造花炮處在地安門甬路西東向其北有廟祀關帝

火德眞君南向者爲天王廟

景山官學在景山前門左右連房

景山一名萬歲山在神武門北爲大內之鎮山高百

餘文周垣二里

北上門爲景山正門南與神武門相對

綺望樓在景山前北上門內後即景山有五峯上各

有亭俱供佛象山旁翼以短垣接東西圍墻有小門

二山後東曰山左裏門西曰山右裏門中南向者爲

壽皇殿門內

宸垣識畧

卷三

十九

壽皇殿九間供

聖祖仁皇帝神御有

御製碑文殿後東北曰集祥閣西北曰興慶閣殿東

爲永思門內爲永思殿又東爲觀德殿仍明舊也

護國忠義廟在觀德殿東塑關帝立馬像林木陰翳周

迴多植奇果

張英夏日從幸景山蒙恩書賜御製詩恭

紀翠繞三峯近榮陪八駿遊海雲連雉堞山雨入

龍樓樹色津門暗烟光碣石浮高吟天濤發清

景 御題留桂滿金波日蘭開玉殿秋 聖慈輝
寶翰麗句寫銀鈎盛事誠希遇深恩豈易酬同分
圭璧彩千古照滄洲

成德景山詩雪裏瑤華島雲端白玉京削成千仞
勢高出 九重城繡陌回環繞紅樓宛轉迎近天
多雨露草木每先榮

厚載門南逼紫禁城俗所謂煤山者本萬歲山其高
可數十仞衆木森然相傳其下皆聚石炭以備閉城
不虞之用者

明崇禎七年九月量萬歲山自山頂至山根斜量二
十一丈折高一十四丈七尺

萬歲山左門山右門于萬歷三十八年添牌有玩芳
亭萬歷二十八年更翫景亭二十九年再更毓秀亭
亭下有壽明洞又有左右毓秀館長春門長春亭壽
皇殿萬福閣下曰臻福堂康永閣下曰聚仙室延寧
閣下曰集仙室萬福閣東曰觀德殿又有永壽門永
壽殿觀花殿集芳亭會景亭興隆閣萬歷四十一年
更翫春樓萬福閣西曰永安亭永安門乾祐閣下曰

嘉禾館乾祐門興慶閣下曰景明館外爲山左裏門
山右裏門

山左寬曠爲射箭所故名觀德永壽殿在觀德殿東
南相近內多牡丹芍藥旁有大石壁立色甚古

臻福堂西有一樹鐵雲板銜樹榦內僅露十之三蓋
古物也

原按宣宗廣寒殿記及楊文貞李文達彭文憲葉
文莊韓襄毅西苑諸記所稱萬歲山皆本金元之
舊至馬仲房始以煤山爲萬歲山迨萬歷間揭萬

歲門于後苑而紀事者往往混二爲一蓋金元之
萬歲山在西而明之萬歲山在北也

明歐大任萬歲山詩五岳來朝日三山路不迷長
楊秦苑北盧橘漢園西珠斗凌空近瑤峯入望齊
萬年同聖壽何用訪丹梯

明嘉靖中設高禖壇于永安門之北臺用木正位昊
天上帝配位皇考興獻皇帝西向高禖設于壇下西
向上位于壇下北向后妃位七于壇南數十丈外北
向用惟弓韉弓矢如后妃嬪之數質明上祭服后禮

服妃嬪各服其服至壇上就位后以下帷中就位上行禮畢分獻太常宮俱退女官導皇后以下至高祺神位前跪女官取弓矢以授皇后以下受訖納于弓韉

稽察內務府衙門在景山西門路北以都察院滿御史二員稽核其事

白石橋在北中門迤西魏家胡同有萬法殿基

明嘉靖四十四年定新建萬法寶殿名中曰壽憇左曰福舍石曰祿舍萬歷二十四年添蓋佛殿

宸垣識畧

卷三

二十二

紫禁城護城河自北閘口分流經內官監白石橋大高元殿之東北上西門之外至紫禁城而東而南經太廟之東玉芝宮飛虹橋之西而其在西一派則自太社太稷壇西至靈臺寶鈔司之東合流于湧福之河以出

大高玄殿在神武門西北明嘉靖中建 本朝雍正乾隆兩次重修有

今上御書扁聯外有下馬石牌二

門前二亭鈎簷鬪桷極盡人巧明時中官呼爲九梁

十八柱今猶存

始陽齋象一宮中供象一帝君範金爲像高尺許乃
明世宗玄修玉容

西苑齋宮獨大高玄殿以有三清象設至今崇奉尊
嚴內官宮婢習道教者俱于其中演習科儀

明夏言雪夜召詣高玄殿詩迎和門外據雕鞍玉
竦橋西度石闌琪樹瓊林春色爭瑤臺銀闕夜光
寒鑪香縹緲高玄殿宮燭熒煌太乙壇白首豈期
天上景朱衣仍得雪中看

宸垣識畧

卷三

二十三

明楊四知高玄殿詩高玄宮殿五雲橫先帝祈靈
禮太清鳳輦不來鐘鼓寂月明童子自吹笙

大高玄殿稍西曰石作有閣又西曰乾明門迤南曰
兵仗局每年七夕兼供宮中乞巧針亦稱爲小御用
監曰西直房即袍房也曰舊監庫屬內官監曰尚膳
外監曰甜食房造絲窩虎眼糖松餅

長元按石作尚存其名兵仗局舊監庫今萬壽興
隆寺玉鉢菴西關帝廟乃其餘址此外俱廢無可
考又金鰲退食筆記云乾明門在大高玄殿之西

承光殿之東尚有基巍然人無知者按今承光殿東有三座門當卽其址

慎刑司署在西華門外北長街路西掌內府之刑罰慶豐司署在西華門外北長街路西掌牛羊廐暨口外牧羣所屬有南苑鹿圈村牛圈槐房村經板庫南海淀各牛圈豐臺羊圈

會計司署在西華門外北長街路西掌內府戶口地畝徵收莊糧等事

官房租庫署在西華門外北長街路東

宸垣識畧

卷三

二十四

營造司署在西華門外北長街路東掌理工作兼司薪炭

武英殿活字板處在西華門外北長街路東

長元按活字板向係銅鑄爲印圖書集成而設康熙中

欽定古今圖書集成總一萬卷凡三十二典曰乾象典歲功典歷法典庶徵典坤輿典職方典山川典邊裔典皇極典宮闈典官常典家範典交誼典氏族典人事典閨媛典藝術典神異典禽蟲典草木典

經籍典學行典文學典字學典選舉典銓衡典食
貨典禮儀典樂律典戎政典祥刑典考工典每典
復分門類共爲部六千一百有九計書五百二十
函又目錄二函年久銅字殘缺過半乾隆三十八
年易以木字印四庫書應刊樣本 賜名聚珍有
御製詩

管轄番役署在西華門外北長街路東專捕緝各案暨
逃走太監等

今之緝事番役唐稱不良人有不良帥主之卽漢之

宸垣識畧

卷三

二十五

大誰何也

萬壽興隆寺在西華門外北長街路西卽明兵仗局也

佛堂前有明米漢雯重修碑 本朝康熙三十九年

勅改有

聖祖御書額

靜默寺在西華門外北長街路西明關帝廟舊址 本

朝康熙五十二年重建 賜名靜默有

聖祖御書額

杭世駿過靜默寺海公茶話詩廣莫風來樹杪聞

殿鈴續續語侵雲諸天爲供伊蒲饌居士誰傳淨
土文謂于殿撰敏中義外風旛憑客借詩中蔬筍讓公分
日晡並馬重闔隔欲請吾師更一云

福佑寺在西華門外北長街路東南向雍正元年建恭
奉

聖祖仁皇帝大成功德佛牌東案陳設 御製文集西
設 寶座有

世宗御書額

昭顯廟在西華門外北長街路西南向雍正十年

宸垣識畧

卷三

二十六

勅建以祀雷神有

世宗御書門額

長元按雍正間建風神雲神廟于東華門外雷神
廟于西華門外皆以春秋二仲遣官致祭

官三倉在西華門外北圍房

傢伙倉在西華門外北城下連房

掌內管領關防署在西華門外路南所屬凡八

都虞司署在西華門外路北掌陞補武職咨行俸餉及
供應畋漁等事

管理三旗納銀莊署在西華門外南長街胡同路東掌
畿輔各莊歲納糧銀之屬

掌儀司署在西華門外南長街織女橋南向掌內府之
典禮署後有觀象臺

明永樂二十二年十二月作觀天臺于禁中在子城
西偏一名內靈臺

眞武廟在織女橋南明寶鈔司故址灰池窰竈久廢今
猶有七十二烟洞之名

寶鈔司其署在臨河後倚河有泡稻草池池中石灰

宸垣識畧

卷三

二十七

瀘渣積成卧象形因名曰象山作房七十二間各具
一竈窰名曰七十二凶神

南花園在西苑門迤南明時爲灰池種植瓜蔬于坑洞
內烘養新菜以備春盤薦生之用立春日進鮮蘿蔔
名曰咬春 本朝改爲南花園雜植花樹凡蘇杭所
進盆景皆付澆灌培植又于煖室烘出芍藥牡丹諸
花每歲元夕送

大內陳設又于秋時收養蟋蟀至燈夜則置之鰲山燈
內奏樂旣罷忽聞蛩聲自鰲山中出也

查嗣堧灰洞詩出窖花枝作態寒密房烘火暖催
看年年天上春先到臘月中旬進牡丹

玉鉢菴卽明御用監舊址後爲眞武廟在西華門外西
南有明翰林侍讀曾曰瑛重修記

考按元史世祖至元二年十二月瀆山大玉海成
勅置廣寒殿輟耕錄謂之玉甕後在西華門外眞
武廟中俗稱爲玉鉢因以名菴 本朝乾隆十年
勅以千金易之置承光殿

關帝廟在玉鉢菴西南卽明御用監南庫舊址

宸垣識畧

卷三

二十八

奉宸苑署在西華門外 西苑門之旁總理苑圍河道
稻田之屬